

**DISSERTATIO
INAUGURALIS
IURIDICA DE
CAUSIS
CONTRACTUM...**





DISSERTATIO IVRIDICA
DE
CAVSIS CONTRACTVM
PERFECTVM RESCINDEN-
TIBVS.

§. I.

Nulla re vehementius contineri Rem pu-
blicam, quam fide, iam olim CICERO *
in arte rempublicam gubernandi peri-
tissimus testimonio suo comprobavit.
Eaque ipsa regula ratione naturali iam
commendata, adeo vera est, ut ulte-
riorem illius probationem conquirere velle supervaca-
neum merito dici queat, idque eo magis, cum pactis
et contractibus mortalium genus, post introducta re-
rum dominia, omnino carere non posse, quotidiana
doceat experientia. Qua etiam ex ratione, apud Roma-
nos non solum pactorum fidem sancte custoditam fuisse,
docemur ab VLPIANO in *l. 1. ff. de pact.* ubi dicit:

A 2

Quid

*Quid tam congruum est fidei humanae, quam ea, quae inter eos placuerunt servare. Imo non exiguae accusantur illi turpitudinis, qui pacta non custodiunt et fidem fallunt, in l. 1. pr. ff. d. const. pec. ** Sed in maioribus quoque nostris referente TACITO ***; deprehendimus, eos adeo tenaces fuisse in fide servanda, ut libertatem illius etiam in alea anteferre non dubitaverint ****. Quam fidei servandae tenacitatem, ad nostra quoque pervenisse tempora, testantur innumerae legum dispositiones, in quibus Legislatores nihil magis quam fidem pactorum servandam commendant, et refractarios variis coerceri student remediis.*

* *Lib de Officiis II.*

** *Ulteriore etiam probationem hujus rei offerunt, Leges Decemvires de Cura in servandis promissis a GELLIO allatae Lib. 20. c. 1. Noct. Attic.*

*** *C. 24. de Moribus German.*

**** *SCHILTER Exercit. 8. Thes 2.*

§. II.

Quemadmodum vero in omni Juris applicatione, ad negotia obvenientia, circumspecta deliberatio minime negligenda est, nisi velis ex summo jure summam efficere injuriam: ita et eam, de qua iam sermo fuit, regulam de servandis pactis, varias ex variis rationibus admittere limitationes deprehendes, si omnia illa, quae in conventionibus perpendenda sunt momenta, accuratius considerare velis. Et enim saepenumero homines simpliciores aut alias non satis ad rem attenti, id quod antea bonum sibi proficuum fore censebant, postea majori deliberatione instituta

stituta maxime sibi damnosum esse deprehendunt, saepe ea promittuntur, quae is, qui promisit, aut penitus non, aut non sine magno incommodo praestare potest. Saepe plura ostentandae benevolentiae causa pollicentur homines, quam serio praestare volunt, saepius lingua praecurrit mentem, saepissime denique ex affectione quadam potius quam seria voluntate, magis conciliandae retinendaeque benevolentiae quam obligationis inducendae causa, studia et officia nostra deferimus. Quid quod malitia hominum, et fallendi circumveniendique cupiditas inter omnes fere homines altas radices egerit, ut peritissimus interdum de contractu inito quaerelam movere, ejusque rescissionem expetere non sine justa cogatur causa.

§. III.

Quae etiam in causa sunt, ut Romani suis iam temporibus, necives e temeraria quacunque promissione damnum incurrerent, *Pacta Nuda*, et *Non Nuda* distinguere annotante HVBERO* variasque rescindendi contractum causas admittere non dubitaverint, non obstante regula alias tritissima, quod ab initio voluntatis fuit, ex post facto necessitatis factum est, et nihil turpius esse quam fidem fallere. Siquidem iis non fuit ignotum, rationem jubere, servari pacta, non qualia qualia, sed utilia et necessaria, quod vel ex eo patescit, dum Praetor in *l. 7. §. 7. ff. d. pact.* pacta conventa, quae neque dolo malo neque contra leges, plebiscita, neque quo fraus cui eorum fiat, facta erunt servare se velle constituit. Quo etiam pertinet, quod Imperator Antoninus in *l. 6. C. de pact.* sancivit, pacta quae contra le-

A 3

ges

ges constitutionesque vel contra bonos mores fiunt, nullam vim habere; moderni quoque juris conditores hujus rei aequitatem deprehendentes, dispositiones romanas recipere non solum, sed novas quoque iis addere, quibus vel contractus ex justa causa rescindendos vel nullos judicandos esse, declaraverunt.

* *In Praelect. ad tit. ff. d. Pactis.*

§. IV.

De iis itaque causis, quae Contractuum rescissioni locum relinquunt, in praesenti specimine differere constitui. Equidem non deesse videntur scriptores, qui de Contractibus, eorumque rite suscipienda constitutione prolixè disputarunt, simulque causas, ex quibus Contractus vel statim ab initio nullus declarandus, vel ex post facto ab instantiam alterius partis rescindendus sit, attigerunt, hisque suis commentationibus omnem jam rem praecoccuparunt ut ideo materiam tantorum virorum lucubrationibus jam exantlatam, iterum atque iterum ruminari, lucem soli affundere velle videatur. Neque tamen id ipsum me deterruit, in praesenti, speciminis loco ulteriorem quandam hujus materiae instituere disquisitionem, siquidem nullum juris articulum tam exacte resolutum esse censeo, ut nova quaedam ex praxi forensi non superaddi queant. *

* *Quos inter eminet praestantissimus NOODT, qui omnia tam accurate excussit, ut vix aliquid alienae reliquerit industriae.*

§. V.

Vt vero eo melius procedat Tractatio, bene discernendae sunt causae, contractum ab initio nullum reddentes, ab illis, quae jus reddunt laesae parti ad rescissionem con-

contractus ut agere queat. Priores proveniunt praecipue ex inhabilitate contrahentium, ex neglecta forma vel interna, vel externa quae ad essentiam contractus regulariter requiritur; ad posteriores vero quod attinet, illarum causa efficiens vel in natura conventionum legibus approbata, vel in pactis et conventionibus a contrahentibus adjectis quaerenda est, et praesupponunt actum ipso jure subsistentem, cum actus ipso jure nullus rescissione non indigeat. * Relictis vero prioribus, cum jam ab aliis satis erudite illae disceptatae fuerint ** nobis sermo erit de posteribus *** eo quidem ordine observato, ut primo de iis dispiciamus, quae parti laesae jus agendi tribuunt, licet in conventionione sibi istud non reservaverit, et his pertractatis, etiam de illis videamus, quarum actio nisi per pactum contractui adjectum de ea prospectum fuerit, locum invenire non poterit.

* *Et quamquam Imperator Iustinianus Nov. 115. c. 3. in qua certam formam exheredationis praescripsit, in fine utatur verbo rescindere, de casu si forma illa non fuerit observata, quisque tamen facile invenire poterit negotio, verbum rescindere ibi improprie sumi, cum omnis actus, in quo forma legibus praescripta, non fuit observata, sit ipso jure nullus, quae sententia etiam in l. 5. ff. de injust. rupt. irrit. testam. probatur.*

** *Quo pertinet Dissertatio Georg. Henr. LINCKII de pa-*
dis vitiosis Anno 1717. Altorfii habita.

*** *De hoc quidem Argumento conscripsit Dissertationem Iacob*
LINDIKE subpraesidio Rhetii in Academia Viadrina ha-
bitam, sub titulo: De rescindendis contractibus nominatis,
sed potius in ea tractavit casus, Obligationem per adim-
pletionem tollendi.

S. VI.

§. VI.

Indolem itaque causarum istarum si paulo penitius consideramus, patescit, quasdam in omnibus, quasdam in certis tantum applicari posse contractibus, ut hinc non sine fundamento eas in communes et proprias partiiri liceat. Inter illas quae omnibus communes sunt contractibus, quarumque in legibus romanis fit mentio, primum videtur locum occupare *Metus*. Etenim cum omnis contractus substantiam capiat ex consensu contrahentium, et invitus nemo ad contrahendum cogi queat, consequens est, omnia illa quae consensum liberum impediunt vel minuunt, quo etiam *Metus* referri meretur, a contractibus abesse debere. Id ipsum, licet Romanis non fuerit incognitum, minime tamen, conventionem quam quis vi metuque coactus inierat, invalidam et rejiciendam esse censebant, sed ex doctrina Stoicorum, cui addicti erant Jcti veteres romani, coactam Voluntatem quoque pro Voluntate, quod ad effectum obligandi attinebat, agnoscendam esse statuiebant, quod probatur *ex l. 21. §. ult. ff. quod met. caus.* Hinc jure Civili rigoroso quidem contractus, licet vis metusve intervenerit, erat adimplendus; Praetori vero romano non minus durum videbatur, alterum adstringere, ad adimplenda, metu quae promiserat. Hinc laesis ex hoc capite succurrit, vel restituendo jus agendi amissum, *l. 9. §. 4. ff. quod met. caus.* vel simpliciter illud rescindendo, quod gestum est negotium, quo pertinent verba *l. 21. §. 5. ff. quod met. caus.* et quando in *l. 13. §. 1. ff. d. minor.* dicitur: *rescissa alienatione dato in rem judicio.* Quem in finem introducta est Actio quod metus causa, quae est actio personalis in rem scripta,

et

et illis conceditur, qui damnum per justum metum illatum passi sunt, adversus illos qui metum intulerunt, omnesque rei amissae possessores, ad rem cum omni causa et omnibus fructibus restituendam; ut vero actio ista locum invenire queat, requiritur adfuisse metum praesentem *l. 9. pr. ff. h. t.* et qui repelli non potuit. Hoc notatu dignum est, quod cum alias ex laesione, tantum contra laedentem detur actio, praesens haec nostra contra tertium etiam possessorem recte instituatur, eaque ex ratione, quod actiones in rem imitetur, in rem scripta dicitur. Reliqua huc spectantia in omnibus compendiis obvia, merito hoc loco omittimus. Vtrum vero nostris temporibus obligatio per metum contracta ipso jure nulla, an restitutione praetoris dissolvenda sit? Icti non conveniunt; plurimi cum PVFFENDORFFIO * non sine fundamento quidem defendunt, in ejusmodi conventionem, in qua metus concurrat, nullam plane subesse obligationem cum non sufficiat promissio ad obligationem inducendam, si constet de iniquitate promissionem extorquentis; alii vero ex receptis in Germania principiis juris romani, metu gesta regulariter et per se valere, restitutioni tamen in integrum locum esse defendunt, si laesa pars ad judicis provocet auctoritatem, illiusque imploret auxilium et officium. Quorum sententiam etiam usu fori receptam esse probant MENOCH. ** GAIL. *** MENCK. **** WERNER. ***** aliique.

* *Lib. 3. C. 6. §. 10. et seqq. de Iur. Nat. et Gent.*

** *Consil. 2. n. 242.*

*** *Lib. 2. obs. 93. n. 4.*

**** *In Theor. et Prax. Pandect. ad Tit. quod met. caus. §. final.*

***** *Select observ. forens. Vol. 4. p. 6. obs. 257. et Vol. 2. p. 3. obs. 24.*

§. VII.

Porro *Dolus* certo modo causis contractum etiam perfectum rescindentibus annumerari meretur; quam enim eadem, quae in antecedentibus de metu jam monita sunt, ad dolum quoque veniant applicanda, eum nimirum omnem excludere consensum, ut hinc contractus, ad quem quis dolo fuerit inductus, ab initio nullus dicendus sit; neutiquam tamen hoc sine limitatione, juris romani legislatores recipiendum esse, censuerunt. Distinctionem itaque constituerunt inter *Dolum negotio causam dantem, et incidentem*, nec non utrum *dolus obveniat in contractu bonae fidei, an stricti juris*. Etenim in contractu bonae fidei dolum causam dantem, nullitatem quidem operari asserbant, idem vero in conventionibus stricti juris negabant, istamque laesionem, aequae ac si dolus incidens fuerit, vel actione *ex contractu reparandam esse contendebant, vel actionem doli, deceptis eorumque haeredibus concedebant*, adversus decipientes eorumque haeredes, si quid ad ipsos pervenerit, ad laesionem corrigendam, hoc est, ad datum et acceptum restituendum. Quod attinet ad usum hujus doctrinae in foro, non desunt, qui jure quoque moderno illas omnes jam enumeratas Romanorum distinctiones strenue defendunt, et contractum bonae fidei dolo compositum, esse ipso jure nullum, contractum vero stricti juris actione doli rescindendum esse, asserunt. Huic sententiae subscribunt GAIL. * MEVIVS ** RICHTER *** Sed si dicendum quid res sit, distinctio illa actionum bonae fidei et stricti juris, fatentibus omnibus accuratioribus Jctis, redolet subtilitatem juris romani, quae cessante diversitate Praetoris et Judicis pedanei.

danei, hodie nullam amplius praestare poterit utilitatem
 ****. Quare et omnes ab ista divisione dependentes
 differentiae contractuum et actionum bonae fidei et
 stricti juris, etiam quod ad doctrinam doli attinet, cessare,
 non dubitamus asserere. Et ut omnem rem brevibus
 componam, cum ex omni contractu hodie agi
 queat ad illius rescissionem, non opus erit actione doli,
 quippe quae jam jure romano a Praetore in subsidium
 proposita fuit. Neutiquam tamen cum illis faciendum
 esse videtur, qui discrimen inter dolum negotio causam
 dantem, et incidentem, in foris quoque nostris sine
 effectu retentum fuisse docent, cum sole meridiano clari-
 us pateat, contractum, ad quem quis alias non con-
 tracturus, dolo inductus fuit, statim ab initio esse vi-
 tiosum; contra vero, si sponte contrahens circa rem
 modumve dolo deceptus fuit, consensus quidem et ani-
 mus ineundi contractum adfuit, et hinc conventionem
 ab initio vitiosam fuisse, nullus probabit, ne tamen
 alter cum alterius damno locupletior fiat, laeso ad illius
 instantiam rescissione negotii merito succurritur. Quam
 in sententiam responsum esse a Facult. Juridica Witte-
 berg. testatur WERNHER ***** multo minus illorum
 opinio erit assumenda, qui nihil interesse arbitrantur,
 utrum actus, in quo dolus concurrit, ipso jure nullus
 dicatur, an rescindatur; quod adstruere intendit
 TITIVS ***** cum vel maxime intuitu fructuum
 perceptorum restituendorum aut retinendorum, diversi-
 tas se exerat.

* *Lib. 2. Obs. 2. n. 6.*

** *P. 6. Dec. 193. n. 13.*

*** *Dec. 87. n. 20.*

**** *Confer. Nicol. Hieron. GVNDLINGII Dissert.*

B 2

de

de Usu practico actionum bonae fidei et stricti Iuris Anno
1724. Halae Magdeb. habita.

***** Select. Observ. forens. Vol. 6. p. 10. Obs. 284.

***** In Iur. Privato c. 8. §. 3.

§. VIII.

Neque hoc loco silentio praetereundum est, quod de *ERRORE* jam in legibus romanis fuit dispositum; illum omnino excludere consensum, expresse cavetur in *l. 15. ff. de Jurid.* ubi dicitur: *si per errorem alius pro alio Praetor fuerit aditus, nihil valebit quod actum est, nec enim ferendus est qui dicat, consensisse eos in praesidem, cum ut Julianus scribit, non consentiant qui errent: quid enim tam contrarium consensui est, quam error, qui imperitiam detegit?* Eaque ex causa merito contractum ejusmodi, quo error concurrit, nullum ab initio esse, dicendum foret. Quam etiam sententiam omnes sequuntur, si error substantialis est, seu circa id quod principaliter intenditur, occurrit, qualis est error in ipso contractu *MENCKE* * in persona ** vel re promissa *l. 9. pr. ff. de haereditat. instit. et l. 83. §. 1. ff. de V. O.* Cum enim ad Contractus substantiam requiratur, ut partes conveniant in idem placitum, sponte sua sequitur, si alter de hac, alter de illa re cogitat, nullam adesse neque conventionem neque obligationem. Aliiter sentiendum erit, si error fuerit accidentaliter, ibi enim contractus quidem subsistit, alteri vero de damno illato satisfaciendum est, ita ut ejus relictum sit arbitrio, utrum velit ad rescissionem contractus agere, ob erroris gravitatem et venditoris dolum *l. 11. §. 5. ff. de act. emt. vel ad id quod interest, adversus venditorem, qui*

quemtorem sciens in qualitate rei decepit, l. 21. §. 2. ff. de act. emt. l. 9. §. 2. ff. de emt. an vero pretii diminutionem velit urgere, praecipue si venditor qualitatem, in qua erratum est, ignoravit, et sic decipiendi animo caruit. l. 45. ff. de emt. l. 13. ff. de act. emt. BERGER ***

* In theor. et prax. pand. tit. emt. §. 46.

** Errorem tamen in persona in Contractibus non adeo attendi asserit STRYCKIUS, Sect. I. Cap. 4. tr. de Caut. Contract. ex ratione, quod nemo contrahentium ignarus esse debeat, conditionis illius quo cum contrahitur.

*** Oecon. Iur. Lib. 3. tit. 5. §. 16.

§. IX.

Nunc ad aliam, quae de laesione, in conventionibus onerosis obveniente agit, juris dispositionem me convertito, ubi tamen statim ab initio praemonendum est, maximam in legibus Justinianeis constitui differentiam inter *laesionem in pretio*, et *laesionem in qualitate rei, quae se exerit*. Ad illam pertinent, quae habentur in L. 2. C. de rescind. emtion. vend. de hac tractatur in L. 20. ff. de aedil. edict. In dicta l. 2. Imperatores Diocletianus et Maximianus, Lupo sic rescripserunt: *Rem majoris pretii si tu vel pater tuus minoris distraxerit, humanum est, ut pretium te restituyente emtoribus, fundum venundatum recipias, auctoritate Judicis intercedente, vel si emtor id elegerit, quod deest, justo pretio recipias.* Imo iidem in simili fere causa Evodiae in l. 8. C. eod. his verbis declararunt: *Nisi minus dimidio justii pretii, quod fuerat tempore venditionis, datum esset, electione jam emtori praestita servanda.*

B 3

Quae

Quae verba, cum tam clara sint, ut nullum remanere possit dubium, istam dispositionem summa niti aequitatis ratione, Iquippe quod durum, inhumanum, et contra bonam fidem sit, locupletari cum tanto alterius praedjudicio, supervacaneum omnino suscepisse videntur laborem ii, qui non humanitatem pro legis hujus ratione agnoscere, sed aliam vel in natura contractuum, vel a favore venditoris in necessitate vendendi constituti quaerere, vel istam aequitatem singularem et reipublicae romanae propriam evincere, navarunt operam. Neque aliorum consensum hucusque impetravit sententia sub praesidio THOMASII* propugnata, qua omnem a Diocletiano in hac lege suppositam aequitatem mere cerebrinam esse satis diffusis allaboravit autor demonstrare rationibus.

* *In Dissertatione de aequitate cerebrina l. 2. C. d. rescind. vend. et ejus usu practico anno 1706. Halae Megdeb. habita.*

§. X.

Conceditur hoc remedium, si verba L. 2. spectes, venditori ejusque heredibus, mentem vero si consideres et rationem illius, hocce rescriptum etiam ad emtores ejusque haeredes applicari posse asserendum est, cum eadem humanitatis causa obtineat in emtore ac in venditore. Quae etiam opinio majorem fidem vel ex eo capere videtur, quod et nemo negabit, contractum hunc esse aequalis et reciprocae praestationis, et venditorem et actorem correlata esse, ut ideo etiam idem jus inter utrosque statuendum sit, per l. 41. ff. de reg. jur. Hisce motus rationibus, huic sententiae subscribere non dubitavit HYBERVS.* Praeterea notatu dignum est, quod

quod hac de controversia judicat PEREZIVS. ** majorem nimirum humanitatis rationem obtinere in emtore quam in venditore, cum venditor sibi imputare debeat, tam vili quod rem suam distraxerit pretio, si quidem de eo, valorem nosse verum, merito praesumi debet *l. 15. C. b. t.* quod tamen in emtore cessat, cum in rebus factisve alienis non scientia, sed ignorantia praesumitur *l. fin. ff. pro suo.* *** Ne vero propter omnem minoris interdum quantitatis laesionem, emtiones temerarie rescindantur, attendunt leges laesionem ultra dimidium, hoc est, venditor nostro uti poterit remedio, si nec dimidiam partem veri pretii consequutus fuerit, emtor vero pro majori pretio soluto, rem ne quidem dimidii valoris acceperit. Et cum res ex diversis temporibus, majus vel minus assumere possit pretium, ut quotidiana docet experientia, et ex diversa decisione legis Aquiliae illiusque capitis primi et tertii probatur, respiciunt leges ad tempus contractus, non obstante, quod alio longiore post contractum factum tempore, res demum tradita fuerit; neutiquam vero ad instituendam hanc actionem requiritur, solutionem praecise factam esse; quanquam enim ex supra citato textu illiusque verbis: *pretium te restituyente*; non pauci assertum istud deduci et probari posse autument, quisquis tamen facili perspicere poterit negotio, eandem hujus legis dispositionem locum habere, licet solutio promissa tantum fuerit.

* In Praelect. ad Pandect. b. 3. n. 3.

** In l. 2. C. d. rescind. vend. n. 7.

*** Negativam contrariam amplexi sunt sententiam CUIACIVS 16. Obsev. 18. BAQVET du Droit d'Aubaine 3. cap. 21. n. 24. FABER. Decad. 8. Error. 7. ex hac ratione, quod ista dispositio singularis propter specialem vendi-

venditoris favorem introducta non debeat extendi ultra verba ; Ista tamen ratio petitionem principii involvit.

§. XI.

Ad rite formandum petitum hujus actionis , quod attinet , plurimi Jctorum conveniunt , quod alternative formari debeat , vel ad rescindendum contractum , vel laesionem corrigendam , ita , ut arbitrio rei relinquatur , quod nam ex duobus eligere malit. Et licet istam sententiam in dubium vocet **COCCEIVS** * istam tamen principii Juris convenientem praxique forensi receptam esse docet **LAUTERBACH** ** **RICHTER**. *** Quod si itaque agente creditore , reus emtori declaraverit , se rem retinere , venditorique id , quod vero deest pretio , supplere velle , nova oritur disceptatio , quid quantumque supplere debeat ? Doctores in duas abeunt partes ; alii sufficere censent , si id quod dimidio deest , addiderit , cum si ab initio hoc observatum fuisset , actori nulla contra emtorem competiisset actio ; alii vero majori quidem jure , supplendam esse quantitatem urgent , quae a peritis et probatis rei aestimatoribus , veram tempore contractus fuisse aestimationem , asseritur ; quorum castra sequi nullus , dubitaverim. Etenim si ea esset legis intentio ; ut suppleri debeat pretium usque ad dimidium tantum , nunquam eveniret , ut emtor rem restitueret , sed semper alteram tanquam faciliorem , sibi commodiorem eligeret viam , qua rem pro dimidio veri pretii , assistente et approbante lege comparare posset. Haec ita se habent , si emtor pretium supplere velit ; sin vero declaraverit , se a contractu recedere velle , resolvitur totus contractus , emtor rem reddit , et a venditore pretium solutum recuperat ; hocque respectu laesio ul-
tra

tra dimidium merito refertur inter causas contractum validum ex post facto rescindentes.

* *In Dissert. de Remed. l. 2. C. d. rescind. vend. Heidelberg. habita.*

** *In Compend. Iur. Tit. de rescind. emtione.*

*** *P. 2. dec. 99. n. 136.*

§. XII.

Vtcrius nunc progredior ad *Laesionem*, quae circa *Qualitatem* rei in conventionibus non raro obvenit. Coercitionem illius susceperere apud Romanos aediles currules, ut patet ex libro ff. 21. ejusque *Tit. I. de Aedilitio Edicto*. Fundamentum recenset VLPIANVS in l. 1. §. 2. ff. dist. tit. *Causa*, inquit, *hujus edicti proponendi est, ut occurratur fallaciis vendentium et emtoribus succurratur, quicumque decepti a venditoribus fuerint: dummodo sciamus venditorem, etiamsi ignoravit, ea, quae aediles praestare jubent, tamen teneri debere, nec est hoc iniquum; potuit enim ea nota habere venditor, neque enim interest emtoris, an fallatur ignorantia venditoris, an calliditate*. Praecavet itaque hoc edictum laesionem duplici quidem modo, dum jubet certiorari emtores de morbo et vitio rei vendendae, et impleri a venditoribus promissa. Vitia quod concernit, dividuntur illa in latentia et patentia, de illis praecipue hoc loco sermo est, quod nimirum venditor illa occultans, obligetur, absolute emtori ad damnum resarciendum, id quod ex l. 14. §. ult. ff. cit. tit. apparet, in qua VL-

C

PIA-

PIANVS ita : *Si talis morbus sit, qui omnibus potuit apparere, ut puta, coecus homo veniebat, aut cicatricem evidentem et periculosam habebat, vel in capite vel in alia parte corporis, ejus nomine non teneri, Caecilius ait, perinde ac si nominatim morbus exceptus fuisset.* Ad eos enim morbos vitiaque pertinere editum aedilitium notandum est, quae quis ignoravit, vel ignorare potuit. Etenim emtor, qui tam incuriose circa proprium negotium versatus, rem vitio patente affectam emit; damnum inde proveniens sibi ipsi omnino imputare debet. Neque hoc editum, animi, sed corporis vitia respicit; expresse enim dicitur in *l. 1. §. 10. ff. b. t.* Aediles de corporalibus solum, non de animi loqui vitiiis, quod etiam in *diēt. l. 1. §. 10. 11.* nec non in *l. 2. huj. tit.* diversis illustratur exemplis. Quemadmodum vero ob morbos aliave rerum vitia aediles concedunt actionem, ita etiam illorum editum jus agendi tribuit, si venditor certas de re vendita iactaverit qualitates, et ex postfacto apparet, venditorem rem falso laudasse; nihil enim naturali aequitati tam consentaneum est, quam ut ea, quae circa rem vendendam prolata sunt, etiam cum veritate conveniant, cum alias venditor videatur dolose alterum ad contrahendum induxisse et decepisse. Sed non sine fundamento quaeritur, utrum commendatio rei de meliori efficiat, ut emtor contrarium asserti deprehendens, ex Editto hoc actionem contra venditorem movere queat? Decisio controversiae petenda erit ex *l. 19. pr. ff. b. t.* ubi discriminatur, utrum commendatio in generalibus subsisterit terminis, an vero venditor certas qualitates se praestitutum esse, fide sua confirmaverit; priori in casu uncti-

neutiquam tenetur, cum omnes venditores suas laudare venales merces, communis vitae usus, et quotidiana doceat experientia, idque eum in finem, uti BRVNNE-MANN. ad *l. 19 ff. b. t.* loquitur, ut citius, non ut pluris res suas vendere valeant; si vero rem inter alias eminere, majorique gaudere bonitate dixerit venditor, ut eo carius vendatur, aut in specie quid promiserit, actione ex edicto hoc aedilitio ad id praestandum omnino adigi potest.

§. XIII.

Duae in hoc Edicto occurrunt actiones, *redhibitoria*, et *quanti minoris*, qua de posteriore, cum non ad resolutionem contractus tendat, in praesenti multa recensere animus non est, sed sufficiat, ea tantum quae ad utriusque actionis differentiam pertinent, paucis attigisse. Haec instituitur, si vitium adsit, quod omnem quidem usum non impedit, aestimationem tamen rei minuit, ut adeo emtor emissit quidem, licet non eodem sed minori pretio; illa vero ut locum habere queat, praesupponit adesse vitium, quod usum rei, ministeriumque hominis plane impedit *l. 1. §. 8. ff. de Aedil. Edict.* ut ea de causa, res nullius plane sit pretii, ut ne expediat quidem talem rem in suis bonis habere. *l. 43. §. 6. ff. eod.* et per consequens, emtor si de vitio ei constitisset, rem nunquam emturus fuisset. Competit actio redhibitoria emtori laeso, nec non ejus haeredibus, adversus venditorem illiusque haeredes instituitur intra sex menses et petitum illius eo dirigitur, ut venditor rem venditam recipiat, pretiumque acceptum restituat. Qua etiam ex ratione me non injuste fecisse arbitror, quod actionem redhibitoriam inter remedia, quae

ad contractus resolutionem tendunt, retulerim; redhibere enim est, facere, ut rursus habeat venditor, quod habuerat, et quia reddendo id fiebat, idcirco redhibitio est appellata, quasi redditio *l. 21. pr. ff. b. t.* facta enim redhibitione omnia in integrum restituuntur, perinde ac si nulla intercessisset venditio. *l. 60. ff. eod.* Ratione objecti utrum nimirum in omnibus rebus, de quibus emtionis contractus constituitur, locum sibi vindicet actio redhibitoria, nonnulli disputant, sed ut mihi videtur sine fundamento; quanquam enim non negari poterit, aediles ab initio de jumentis solum proposuisse edictum, verba tamen illi adjecta: *quae de jumentorum sanitate diximus, de cetero quoque pecore omni, venditores faciunt*, *l. 38. §. 4. 5. ff. de Aedil. Edict.* probant, locum quoque habere antea dictam actionem in aliis pecoribus. Imo et in rebus inanimatis mobilibus, aequae ac immobilibus, eam admittit VLPPIANVS in *l. 49. ff. b. t.* verbis: *etiam in fundo vendito redhibitionem procedere, nequaquam incertum est, veluti si pestilens fundus distractus sit: nam redhibendus erit.* Tandem monendum est, si ob vitium rei cohaerens, redhibitoria instituitur actio, probandum est ab emtore, vitium aut morbum tempore celebrati contractus jam adfuisse. MEVIVS * Casus enim superveniens, ex quo res periit, non a venditore praestandus, sed ab emtore ferendus est, per *l. 3. C. b. t.* Aliquibus tamen in locis, per expressas leges, aut consuetudinem, certum, determinatum est tempus, intra quod de vitio apparente tenetur venditor, illo vero elapso, nulla contra eum institui potest actio, nisi conventionem aliud inter contra-

tra-

trahentes fuerit cautum, qualia Exempla recenset STRYCK **

* *Ad Ius Lubecens. lib. 3. tit. 6. art. 14 no. 3.*

** *In Usu modern. pandect. ad tit. de aedil. edict. §. 28.*

§. XIV.

Hac itaque ratione emtionis contractum rescindi ob laesionem, vel in pretio vel in qualitate rei obvenientem, nullum remanet dubium. Quatenus vero hae causae in aliis locum sibi vindicare queant contractibus, nunc demonstrandum est. Quod laesionem concernit, edicto quae vindicatur aedilitio, eam in aliis quoque opponi posse conventionibus onerosis, patet ex *l. 1. ff. et l. 19. §. 5. ff. d. Aedil. edict.* ubi VLPIANVS comparatione inter emtionem et permutationem instituta, ad hanc quoque propter identitatem rationis, edicti dispositionem applicari posse demonstrat verbis: *Emtorem accipiendum esse eum, qui pretio emit. Hinc si quis permutaverit, dicendum est, utrumque emtoris et venditoris loco haberi, et utrumque posse ex hoc edicto experiri.* Et quoniam divisio rerum communium, vicem emtionis obtinet, quod patet ex *l. 1. C. com. utr. jud.* eandem quoque dispositionem, ratione laesionis in illa obvenientis, obtinere statuunt plerique Iuris interpretes, quod et de datione in solutum asserunt. Minime vero conductor, in contractu conductionis provocare poterit ad actionem redhibitoriam, si v. g. aedes conductas insalubres esse deprehenderit, non obstantibus illis omnibus, quae pro ista opinione stabilienda adduxit CVIACIVS * et GOTHOFREDVS **, cum verba legis

C 3

63. ff.

63. ff. de Aedil. edict. tam clara sint, ut ferme nulla indigeant ulteriori explanatione, neque tamen dicendum est, conductori nullum ob rem locatam vitiosam, competere remedium; cum instituta actione conducti idem consequatur, quod actione redhibitoria obtinere potuisset. Multo minus edicti dispositio ad donationem poterit applicari; siquidem ut supra jam demonstratum fuit, aediles tantum ad conventiones, in quibus utraque pars aliquid praestare suscepit, respexere, et agitur in actione redhibitoria ad reddendum, quod altera pars accepit; quid vero donator restituere vellet, cum nullum pretium, nullaue alia res intervenerit? Quae sententia expresse confirmatur in l. 62. ff. d. Aedil. edict.

* L. 12. observ. 38.

** In not. ad l. 63. ff. d. aedil. Edict.

§. XV.

In extensione vero remedii l. 2. C. de rescind. vend. ad alios, contractus non omnes conveniunt Jcti. Alii hanc resolutionis causam secundum verba legis, tantum ad emtionis contractum pertinere autumant, inter quos est CUIACIUS et ANTON. FABER * alii spectata Legislatoris intentione, ipsam dispositionem ad alios quoque contractus, in quibus ab utraque parte aliquid praestandum est, extendi posse docent, et quidem majori, uti quidem mihi videtur, fundamento, et huic sententiae favent LAVTERBACH ** MENKENIUS *** Cum itaque permutatio dicatur mater, et vicina emtionis, in l. 1. ff. de contrah. emt. l. 2. ff. de rev. permut. ad eam quoque applicari poterit remedium dict. l. 2. aequè ac ad contractum locationis, si v. g. locator ne dimidiam

diam quidem partem justae mercedis acceperit, vel conductor ultra duplum justae mercedis solvere se obligaverit; iisdem enim regulis juris contineri hunc contractum, ut emtionem, dicitur in *l. 2. pr. ff. de locat. l. 19. §. 1. seqq. ff. de act. emt. l. 21. C. et l. 25. §. 1. ff. d. locat.* Praeterea extenditur ad divisiones haereditatis aliarumque rerum communium, tam judiciales, quam extrajudiciales arg. *l. 1. et 3. C. com. utr. jud.* Specialiter enim in his divisionibus prae aliis negotiis requiritur aequalitas, siquidem divisio est alienatio necessaria, et eo fit animo, ut suae quisque partis dominus maneat in solidum, arg. *l. 77. ff. d. legat. l. 1.* adeoque dividendum voluntati maxime videtur consentaneum, ut alteruter nullo modo, ne intra dimidium, multo minus infra dimidium laedatur, sed ad rescissionem divisionis sufficit qualiscunque laesio, cum in *l. 3. C. com. utr. jud.* nulla fiat mentio laesionis ultra dimidium, sed simpliciter rescissio ob laesionem admittatur; nec aliud dicendum esse existimaverim in datione in solutum.

* *In Error. pragmat. p. 1. dec. 8. Error. 8. seqq.*

** *Ad Tit. 5. libr. 18. ff. sub. lit. O.*

*** *In Theor. et Prax. Pandect. Tit. de rescind. Emptione. §. 7.*

§. XVI.

Haec ita obtinent in negotiis onerosis, quibus utraque pars ad aliquid praestandum obligatur; in negotiis vero lucrativis, illa minime applicari posse, quilibet primo statim perspicit intuitu. Sunt tamen aliae causae, ex quibus etiam donationes retractari possunt, quo pertinet, si factae donationis ex justa causa poeniteat donatorem e. g. Si illi, in quos collatum est beneficium, se illo

illo indignos reddunt per ingratitudinem erga donatorem, vel si donatori ipsi cariora postmodum nascuntur pignora, liberi scilicet, vel si propter laesionem legitima reliquorum liberorum, rescinditur tanquam inofficiosa. Ad hanc doctrinam praecipue spectat dispositio *l. 8. et l. ult. C. d. revoc. Donat.* quae quidem non pugnant cum *l. 5. C. eod. tit.* in qua Donationes perfectas tam validas esse asseritur, ut ne quidem auctoritate rescripti Imperatoris possint revocari, siquidem dicta *l. 5.* de temeraria loquitur revocatione, qui citra justam suscipitur causam. Etenim donantis intentio utique est ut nullo casu res donata ad se revertatur, *l. 1. pr. ff. d. donat. l. 27. ff. d. mort. caus. donat.*, nisi tale quid emergat, quod si tempore donationis extitisset, donatorem ad donationem perficienda deterruisset. Ingratitudo itaque prima causa est, ob quam donatio in totum potest rescindi; non tamen qualiscunque sufficit, sed quae approbatur in *l. 8. et ult. cit. tit.* ubi quinque ingratitudinis causae enumerantur: si donatarius in donantem injurias effundat atroces; quae vero tales sint, nullibi quidem in lege determinatum reperitur, nec facile determinari poterit, sed arbitrio judicis relinquendum est, qui illud ex qualitate personarum, locorum, verborum, factorum, et temporum judicare debet, *§. 9. Inst. de Injur. l. 7. §. ult. ff. d. injur.* GIPHANIVS * Porro si donatarius donatori impias et violentas manus intulerit, verberibus manu vel gladio exceperit, HILLIGER * * sive ipse sive per alium illud praestiterit *cap. 27. d. R. I. in 6to.* modo animo factum fuerit doloso, nam si eum, tanquam in vasorem, in defensione licita offendit, ex hoc capite non tenetur BRVNNEMANN * * * sicuti nec ille, qui in joco, vel

vel non invitum, vel in summa ebrietate percussit, huius criminis reus accusari poterit. DONELL. ****. Praeterea si donatarius iacturae molem ex insidiis suis ingerat, quae non levem sensum substantiae donatoris imponat. Quod verbum *iacturae* non exiguum inter Doctores excitavit dissensum; iure quidem Canonico, per damnum grave exprimitur, licet satis obscure *Cap. fin. X. de donat.* Hinc alii de Damno ultra dimidium. MOZZ ***** alii de laesione in tertia, HILLIG. ad DONELL. ***** alii in sexta RIPA ***** alii in centesima parte bonorum explicant ***** ego vero cum Menochio causae decisionem merito arbitrio iudicis relinquerem, deficiente speciali legis dispositione. Vterius dictis annumeratur causis, si donatarius vitae periculum aliquod donanti intulerit, ubi tamen minime cum iis est sentiendum, qui propter conatum, revocationem donationis admittunt, cum verba proposita satis clare evincant, damnum vere illatum esse debere; tandem, si conventiones donationi adjectas minime implere voluerit; quod eo minus dubium esse poterit, cum in omni conventionem sub modo inita, modo adjecto sit satisfaciendum, nisi accipiens rem datam restituere velit, hinc idem quoque in donatione locum habebit, modo per donatarium steterit, quod modum non impleverit.

* *Ad dict. §. 9. Inst. de Injur.*

** *Ad Donell. Enucleat. lib. 14. Cap. 27. lit. 4.*

*** *Ad l. final. C. de revoc. donat.*

**** *Lib. 14. Cap. 27. n. 20.*

***** *Traçt. de Contract. Cap. quo modo annull. et revoc. donat. n. 51.*

***** *Lib. 14. Cap. 27. lit. d.*

D

***** In

***** *In Comm. ad. l. fin. C. d. revoc. donat. quaest. 24.*
n. 87.

***** *de arbitr. Iudic. quaest. lib II. cap. 74. n. 2.*

§. XVII.

Haec de ingratitudine. De supervenientia liberorum in *l. 8. C. dict. tit.* sequens proponitur casus: *Si patronus liberos non habens bona omnia vel partem aliquam bonorum libertis donavit, quod tunc tota donatio ad donatorem reverti, et in ejus arbitrio ac dictione manere debeat.* Quamquam vero si verba legis spectes, eam ad alios extraneos minime extendendam esse censendum foret, cui sententiae etiam favent BACHOV* HOTTOMANNVS** contraria tamen opinio communi calculo ab alijs majori quidem jure approbatur, FRANZ*** CARPZOV**** usuque fori corroboratur, nunquam enim praesumitur, quod quis successiones alienas, propriis suis anteponeere voluerit, potius omni donationi ex dispositione legum, tacita inest conditio, *nisi mihi nati fuerint liberi.* Sufficit autem, unus tantum si nascatur, quoniam liberorum nomine etiam unus comprehenditur, et sine liberis decisisse non videtur, qui unum relinquit, *l. 148. ff. de V. S.* neque ullum est dubium quin liberis post donationem factam natis, vivo autem patre adhuc iterum decedentibus, donatio iterum reconvalescat, exemplo testamenti, in quo filius postea natus praeteritus, (cujus intuitu testamentum rumpebatur) vivo adhuc patre decedit, ubi ex Praetoris aequitate conceditur bonorum possessio *l. 12. pr. ff. de injust. rupt. irrit. test.* confer. STRVV***** Ad inofficiosam quod attinet donationem, de illius revocatione agitur *in tit. peculiari 29. Cod. lib. 3. de inoffic. donat.* et denotat libera-

liberalitatem immoderatam, qua portio legitima officio pietatis certis personis ex defuncti bonis debita adimitur vel minuitur. Cum enim Jura Civilia, naturalem aequitatem et obligationem respicientia, expresse jusserint, ut liberis, parentibus, et certo respectu fratribus et sororibus, ex bonis defuncti, salva esse debeat vel triens vel semis, pro diversitate numeri personarum, tali quidem favore adjecto, ut nullo modo onerari, multo minus penitus auferri queat, nisi ex causa in lege ipsa determinata; hinc omnes illos actus, quibus legitima illa laeditur, inofficiosos dicunt, quia pietatis officium liberis et parentibus debitum offendunt, RITTERSHVSIUS
 ***** hinc testamentum inofficiosum, dotis datio inofficiosa et ad exemplum illius etiam donatio inofficiosa proponitur, uti patet ex l. 1. verb. juxta formam l. 2. in fin. verb. ad similitudinem. l. 4. verb. ad instar. et l. ult. C. b. t. in qua CONSTANTINVS Imperator expressis hoc inuit verbis: *non convenit dubitari, quod immodicarum donationum omnibus querela ad similitudinem inofficiosi testamenti legibus fuerit introducta, ut sit in hoc actionis utriusque vel una causa, vel similis existimanda, vel idem et temporibus, et moribus.* Quibus ex omnibus consequitur, causam hujus dispositionis partim fuisse maximum legitimae favorem, partim fraudem illorum, qui contra pietatis officium ad intervertendam inofficiosi testamenti querelam, et defraudandos liberos in legitima, patrimonium suum immensis donationibus exhauriebant l. 27. §. 3. ff. de legat. 2. Quare etiam secundum Alexandri Severi Imperatoris et hujus auctoris dispositionem, consilium fraudandi necessarium esse, ad intervertendam ejusmodi donationem, non incongrue con-

jicitur; istud tamen Imperatores sequentes non praecise requirunt, sed remedium contra donationem re tantum inofficiosam concedunt. Hinc et hodie eventus absque consilio sufficit, licet intervertendae inofficiosi testamenti querelae animus non fuerit. CVIAC.
 ***** MOLINAEVS ***** HILLIGER *****.

* *Ad Tret. d. 19. Tb. 7.*

** *L. amic. respons. 12. decad. 7.*

*** *Exerc. 5. qu. 10.*

**** *Part. 2. Const. 12. def. 22.*

***** *Exercit. 23. tb. 37.*

***** *Ad Nov. part. 5. Cap. 13. num. 2.*

***** *In C. b. t.*

***** *Tract. de inoff. test. n. 20. in fin.*

***** *Lib. 19. C. II. Lit. F.*

§. XVIII.

His tribus casibus igitur, donationes retractari, ex iis, quae jam proposita sunt, patescit, diversa tamen cum in finem introducta sunt juris remedia. Etenim *ingratitude parit actionem revocatoriam*, quae est actio personalis, ex delicto originem trahens, rei persecutoria, sed ad heredes non transitoria, et datur donatori adversus donatarium, qui ingratitude sua, liberalitate indignum se reddidit, ad revocandam donationem, vel per restitutionem illius, quod donatum fuit, vel si promissio saltem intervenierit, ad liberationem ab obligatione. Vocatur etiam alias *Condictio ex l. fin. C. de revoc. donat.* quippe quae totam hanc suppeditat definitionem. Actio haec, quia vindictae magis, quam rei persecutionem continet, non transit ad haeredes, neque active neque passive, ideoque si donator vivus de injuria non fuerit conquestus, illa censetur remissa, et hinc nec haeredit.

redibus actione revocatoria uti licebit. *l. 1. C. de revoc. donat.* Praeterea illae tantum res, quae adhuc apud donatarium sunt tempore motae actionis revocatoriae, restituendae sunt, minime vero, quae bona fide jam alienavit, vendidit, in dotem dedit, siquidem factum donatarii, tertio possessori neutiquam debet nocere. Fructus quoque post litem contestatam percepti a donatario restituendi sunt, nam per litis contestationem donatarius, qui hucusque rem bona fide possedit, statim in mala fide constituitur, et amplius ex ista re nihil acquirere potest. MENCKEN * Per supervenientiam liberorum donatio resolvitur ipso jure, dominiumque rei donatae statim ad donatorem revertitur, quod innuunt satis clare verba *l. 8. in donantis arbitrio ac voluntate mansurum*, et hinc donatori competit vindicatio, quae licet cum actione revocatoria in multis conveniat, in eo tamen differunt a se invicem, quod praesens haec vindicatio, non solum donatori, sed ejus quoque haeredibus conceditur, adversus donatarium, pariter ac illius heredes. Nihil itaque remanet apud donatarium, nisi quod casu periit, aut bona fide consumptum fuit, hoc enim revocationi obnoxium esse juris ratio non patitur, siquidem donatarius debitor speciei est, et hinc ejus interitu liberatur. arg. *l. 16. ff. de donat. int. vir. et uxor.* Tandem propter inofficiosam donationem, concedunt jura querelam inofficiosae donationis, quae ad imitationem querelae inofficiosi testamenti, datur illis, qui donanti sanguine juncti sunt, descendantibus, ascendentibus, et collateralibus, qui alias successuri sunt ab intestato, sive tempore donationis jam adfuerint, sive postea nati sint. Non tamen illis omnibus simul agere licet, sed secundum successionis ordinem, ita, ut illi, qui reliquos successione excludunt, etiam in movenda quere-

la

la inofficiosae donationis praeferantur. arg. *l. 14. ff. de inoff. test.* Locum habet ista actio adversus donatarios, in quos collata est inofficiosa donatio, cujuscunque sint conditionis, illiusque haeredes; ut fratres vero actionem hanc movere queant, requiritur donatarium infamia vel levis notae macula laborare. Tendit ad inofficiosae donationis rescissionem et portionis legitimae restitutionem, non enim hac actione restitutio omnium rerum donatarum petitur, sed tantum pro quantitate debitae legitimae. arg. *l. un. C. de inoff. dote.* Neque sufficit donationem ab initio fuisse inofficiosam, sed ut quoque tempore mortis, legitima non salva sit iis, quibus debetur. Etenim si donans post donationem alia acquisiverit bona, ex quibus legitima praestare queat, querela ista cessabit, utrumque igitur tempus, et donationis factae et mortis donantis, merito spectari debet.

* *Theor. et prax. pandect. ad tit. de Donat. §. 17.*

§. XIX.

Deveniendum est nunc ad reliqua hujus Dissertationis capita, in quibus demonstrare constitui, quo modo ex pacto adjecto contractus iterum rescindi queat. Nullum enim est dubium, quin pacto indoles contractus alteretur ex contrahentium voluntate atque conventionem, quam sequi naturali conveniens est aequitati §. 41. *Inst. de Acqu. rer. dom.* Huc spectant, quae in emptione plerumque obveniunt, pactum retrovenditionis, Lex commissoria, pactum additionis in diem, aliaque. Bene tamen a se invicem discernenda sunt pacta resolutiva, et suspensiva. **LEX COMMISSORIA** * est pactum emptionis contractui eo fine adjectum, ut pretio non soluto emptio retro resolvatur, et res inempta censeatur, *l. 1. 2. et 4. ff. de leg. Commiss.* Ex qua definitione apparet, pactum istud annumerandum esse resoluti-

lutivis, dominium enim, quod antea traditione a venditore in emtorem translatum fuit, ipso jure recedit in venditorem. Haec commissoriam qualitas ordinariae emtionis naturae non cohaeret, sed demum ex verbis et pactis contrahentium apparet *l. 14. C. de rescind. vend. et l. 3. ff. de leg. commiss.* verbo: *adjicitur.* Attamen non quaevis voluntatis declaratio sufficit, sed verba requiruntur directa, quae scilicet de contractus resolutione et dominii translatione aperte concepta sunt, v. g. res sit inempta, emtio sit nulla, non facta, vel quae per necessariam consequentiam idem involvunt, ac directa: e. g. si pretium non solvatur, liceat venditori rem venditam vindicare, et alteri vendere. **ZASIVS. **** Quo etiam referenda esse censeo, si dicatur, res empta restituatur, revertatur. Quamquam enim inveniantur, qui hic dubium movent, ea ex ratione, quod haec verba factum hominis interveniens praesupponant, possessoris nimirum, qui rem venditori restituere debeat, ut ideo contractus non ipso jure resolvatur, sed actione venditi instituta, ad restituendam rem non soluto pretio, officio judicis, qui ad petitionem venditoris compellit emtorem, ut rem venditam restituat. **STRYCK ***** hoc tamen non obstante, contrariae sententiae calculum addere non dubito, cum probari nunquam poterit, ad essentiam resolutive pacti requiri, ut ipso jure et sine interveniente actione et officio Judicis contractus resolvatur. Praeterea non praecise ad hujus pacti valorem requiritur, ut in continenti istud interpositum sit, quod quidem jure romano exigitur, sed eundem hodie producit effectum, siue incontinenti, siue ex intervallo adjectum fuerit, cum hodie omnia pacta, quae modo non bonis moribus, et expressis legibus contrariantur, obligationem efficacem et actionem producant. **BRVNNEMANN.**
**** Ne-

**** Neque quidquam ad rem facit, utrum certus dies, intra quem pretium ab emtore sub poena commissi solvendum sit, statutus fuerit nec ne. Quemadmodum enim in casu priori, dies adjectus interpellat pro venditore, ita in posteriore emtor post modicum tempus, per interpellationem in mora est constituendus, *l. 23. ff. de O. et A.* Hoc vero non praetereundum est, quod licet elapso die adjecto, vel interpellatione interposita, conditio hujus pacti commissorii existat, illud tamen antea nullum producit effectum, nisi Venditor hoc suo jure uti, et rem inemtam esse voluerit *l. 2. 3. 6. ff. de leg. Commiss.* Siquidem hoc pactum involvit jus quoddam, in favorem venditoris adjectum, cui renunciare ipsi liberum est. arg. *l. 41. ff. de minor. et l. 2. C. de Jure emphyteut. et l. 2. ff. de leg. commiss.* Venditori igitur electio competit, utrum commissoriam legem exercere, et emtionem irritam declarare velit, an vero salva emtione, agere malit ad id quod interest; lectione vero semel facta, variare amplius et ab eadem resilire haud licet, neque enim ab eo, quod semel vel expresse, vel tacite placuit, ex poenitentia quispiam recedere, vel id repudiare potest. *l. 4. §. 2. l. 7. ff. h. t. l. 20. ff. de opt. leg.* Hinc pretio toto, vel illius parte, post diem in pacto commissorio statutum accepta, vel usuris pretii exactis, juri suo renunciasse censetur venditor.

* *Lex hoc loco pro pacto sumitur, ut quemadmodum Lex Subditorum actionibus modum et formam praescribit, ita quoque hoc pactum contrahentibus terminos ponit et limites, pacta enim dare legem contractui, et contractus legem accipere ex conventionione asseritur in l. 7. §. 5. ff. de pact. l. 23. ff. de R. I. et l. 1. §. 6. ff. de pos.*

** *Ad tit. ff. d. Leg. Commiss. n. 13.*

*** *Ad Compend. Lauterbach. Tit. de Leg. Commiss. ad verba: non etiam sufficiunt.*

**** *Ad l. 1. ff. de leg. Commiss. n. 6.*

§. XX.

§. XX.

Pactum retrovenditionis nunc quoque huc refertur, quo inter emptorem et venditorem convenit, ut emptor venditori pretium restituenti, vel quodcumque huic placuerit, vel intra certum tempus, vel post, five ad certum tempus, rem emptam retrovendere teneatur. Quanquam vero ex adjecto vel non adjecto tempore diversi casus veniant separandi, quantum tamen ad praesentem attinet disquisitionem, diversitas illa nullam praestat utilitatem, quandoquidem utroque in casu emptio- nis contractus resolvitur. Quo usque vero ad hanc resolutionem actio possit institui, ex adjecto constare poterit termino. Nullo adjecto et determinato, actio ad reluum nullam praescriptione extinguitur, eo vero adjecto tanquam termino ad quem, intra hoc tempus emptor reluens admittitur, non vero eo elapso. Sin autem tempus adjectum tanquam terminus a quo, nach Verlauff 5. Jahren, soll Verkäufer das verkaufte Gut wieder einzulösen frey stehen, reluendi facultas elapso illo tempore conceditur emptori, cum nondum effluxo tempore emptor ad rem restituendam adigi nequeat, tametsi pretium offeratur, hoc casu enim tempus in favorem emptoris prioris adjectum est, ne breviori statim tempore iterum dominio exuatur, et per breviorum rerum suarum transmutationem damnum ei inferatur. Quodnam vero pretium venditor jam redempturus solvere debeat, judicandum est ex paciscentium verbis, cum enim pacta dent legem contractui l. 7. §. 5. ff. de pact. ab illis unus invito altero recedere non potest, hinc licet rei venditae aestimatio interim vel creverit, vel deminuta fuerit, pretium neque augeri neque minui poterit. Si vero nihil de pretio con-

E

ven-

ventum, contractus ita resolvendus, ut celebratus est, arg. l. 35. ff. de R. I. et sic idem pretium, quod datum, reddendum est, impensas tamen quas possessor interim in illam rem fecit, et quidem necessarias, quae nisi factae fuissent, res ipsa vel periisset, vel inutilis et deterior red-dita fuisset, simul restituit, modo tamen perpetuam praestent utilitatem, alias enim iniquissimum foret, venditorem reluentem restitutione impensarum in conser-vationem rei factarum, onerare velle, ex quibus nullam utilitatem hucusque percepit, neque de futuro percipere poterit. * Pari modo sentiendum est de utilibus, quibus res quidem non conservatur, sed melior utiliorque red-ditur, fructusque illius augentur, modo non inter partes conventum deprehendatur, ut ratione illius, quod interim inaedificatum fuerit, venditor ab emtore tempore relui-tionis nihil repetere debeat, Daß alles was währenden Wiederkauffs Zeit, Abkäuffer in das Haus gewendet, auf seine Kosten gethan, und von künftigen Wiederkäuffer nichts wieder fordern solle. Quae conventio eo magis necessaria videtur, ut occurratur fraudi emtoris, jus retrovendi-tionis intervertentis, qui alias tantum in fundum impen-dere posset, ut venditori id restituere et sic rem recupe-rare difficile aut plane impossibile foret, impensas vero voluptuarias, quae speciem rei ornant, non etiam fructum augment, redemptor refundere non cogitur; tollere eas emtori permittitur, si sine detrimento rei auferri pos-sunt, ne aliter cum alterius damno fiat locupletior.

* Dissentit MARTINI, in Dissert. de Pacto retrovenditionis Anno 1711. Wittebergae habita §. 18. Sed sine sufficienti argumento.

§. XXI.

Praeterea *Pactum additionis in diem* emtionibus adjicitur, et venditori facultatem tribuit, ut si alius forsitan meliorem conditionem intra certum tempus obtulerit, rem venditam illi addicere queat. Concipitur hoc pactum vel sub *conditione suspensiva*, v. g. si intra anni spatium melior conditio allata non fuerit, tibi pro tanto pretio res vendita sit, vel, perficiatur emtio, nisi alius meliorem conditionem obtulerit. *l. 2. pr. ff. h. t.* vel sub *conditione resolutive* v. g. tibi res 100 Th. sit vendita, si vero quis plus obtulerit intra anni spatium, sit res inempta, et hoc respectu pactum istud inter causas contractum rescindentes merito refertur, cum enim haec conditio venditionem constituat puram, necessario consequitur, quod interim dominium et periculum transeat in emtorem, nec non perceptio fructuum et accessio-
num; existente vero conditione, omnia resolvuntur, ita, ut dominium statim ipso jure redeat ad venditorem, qui vel rem vindicare, vel actione venditi ad rem restituendam agere potest, prout vel verbis directis vel obliquis contrahentes mutuam declaraverunt voluntatem. Existere autem censetur melior conditio, si alius venditori ejusve heredi intra tempora constituta bona fide plus obtulerit, quod non solum ex quantitate pretii, sed etiam pecuniae qualitate, citiori solutione vel onerum sublevatione judicandum, *l. 4. §. fin. ff. h. t.* quo etiam pertinet, quod non desideret evictionis praestationem; et in summa, quicquid ad venditoris pertinet utilitatem, pro meliori habetur conditione. *l. 5. ff. h. t.* Adlata meliore conditione, requiritur ut venditor se declaret, se usum esse hac lege, liberum enim est venditori meliorem condi-

tionem oblatam rejicere, et primam si velit sequi. Ita VLPIANVS recenset, Sabinum scripsisse: licere venditori sequi primam conditionem quasi meliorem, quibus verbis innuit, ab ipsius venditoris arbitrio dependere, utrum velit primam conditionem quae revera deterior est, alteri conditioni, quae in effectu est melior, praeferre an vero contrarium sequi iudicium? Nemini enim beneficium invito obtruditur, sed quisque juri pro se adjecto renunciare valet, quod et in antecedentibus, exemplo legis commissoriae probatum est, praeterea quoque priorem emitorem de oblata meliori conditione certiores reddere debet venditor, quo et ipse se declarare queat, an idem pretium solvere velit, ubi posteriori emtori praefertur, propter speciem juris protimiseos, quod illi competit; idem vero adjicere si detrectat, totus resolvitur contractus, nec non pignus alii interim constitutum, fructus quoque percepti venditori sunt restituendi, l. 6. §. 1. ff. h. t. et omnia in pristinum statum reducuntur, ac si nunquam emptio et venditio celebrata esset.

§. XXII.

Tandem huc pertinet, quod venditio per *Ius retractus* seu *jus protimiseos* interdum etiam resolvatur. Haec duo Iura licet communiter a plerisque Iuris interpretibus confundantur, non exigua tamen inter illa occurrit differentia. Equidem in eo conveniunt, quod utrumque involvat Ius quoddam praelationis certis concessum personis, vi cujus novo emtori praeferri sibi que rem tradi jure postulant, accuratius tamen utriusque naturam investigantes deprehendimus, jus protimiseos involvere jus venditionem nondum factam impediendi, et alterum ut mihi prius rem offerat emendam, comp-

pellendi ; contra vero jus retractus tribuit facultatem, venditionem consummatam etiam rescindendi, et rem in alium jam translatam, mihi que prius non oblatam, refuso pretio ab emtore revocandi. Competit haec facultas vel ipso jure, seu a necessitate quadam juris scripti, aut non scripti partibus imposita, vel ex voluntate Domini, per actum inter vivos, aut ultimam voluntatem declarata, unde nata distinctio, in retractum legalem, testamentarium et conventionalem. Quibus Personis jus istud tribuatur auctoritate legis, hoc loco prolixè recensere animus non est, cum jam in omnibus Pandectarum Compendiis illud speciatim tractatum inveniat, hoc vero non praetereundum est, jus retractus plerumque circumscribi certo tempore, lege vel arbitrio hominum determinato. Ita ob Dominium directum in emphyteuticis bonis intra duos menses a tempore factae denunciationis, et in feudis, intra annum utilem, a domino directo est usurpandum. Jus retractus liberis ad revocanda bona avita concessum deficit Iure Saxonico Electorali, postea quam judicialis resignatio et traditio peracta est. *Const. El. 31. Part. 2.* De illo vero, quod ex conventionem partium descendit, actio intra 30. annos adhuc moveri potest

SCHOEPFFER. * Exercetur jus retractus per actuale pretii, de quo cum extraneo convenit solutionem, vel rite factam illius oblationem, et si solutio in distinctos terminos distributa est, retrahens paribus cum primo emtore uti potest dilationibus, si vero res novo emtori jam tradita est, retrahens simul cum pretio non solum sumtus tempore contractus factos emtori restituere tenetur, sed eidem quoque, tanquam bonae fidei possessori, necessarias et utiles impensas

E 3

quas.

quas in praedium ipsum absque fraude fecit, refundat necesse est.

* *In Synops. Iur. Privat. tit. d. contrab. emt. n. 57.*

§. XXIII.

Quemadmodum vero circa causam doli, metus et laesionis singulares in jure actiones sunt proditae, quibus laesus jus suum persequi poterit: ita et nunc quaeritur, qua actione is qui ex adjecto pacto jus suum deducit, experiri debeat? Equidem pacta contractui adjecta jure jam romano valebant, ac si de natura illius essent, et hinc illius assumebant actionem, modo in continenti essent adjecta, quae differentia hodie non attenditur, sed ex intervallo adjecta non destituuntur actione, nomine, non vero re ab illa distincta conditione ex moribus. Attamen cum actio quoque realis interdum sibi locum vindicare possit, paulo distinctius res ita erit componenda, nimirum videndum, quibusnam verbis usi fuerint circa pactum adjiciendum, partes contrahentes, utrum directis; v. g. res sit inemta, rem vindicare liceat, habeatur ac si nullus unquam celebratus fuerit contractus, an vero obliquis, v. g. emtor rem restituat. Priori casu nullum est dubium, quin rei vindicatio competat venditori ad rem ab emtore pariter ac a tertio possessore restituendam BERLICH * STRYCK. ** Posteriori casu vero competit venditori actio personalis, siue eam nomines ex contractu emti, siue conditionem ex moribus, ad resolvendum contractum, adversus emtorem, non tertium possessorem CARPZOV. *** Quae omnia locum habent in pacto commissorio, retrovenditionis, additionis in diem, jus retractus vero et quidem legale, peculiarem assumit actionem, redhibitoria quae dicitur,

citur, et actio personalis in rem scripta est, nam contra quemcunque possessorem rei, retractui obnoxiae locum habet, illud vero, quod ex conventionione dependet, personalem parit actionem adversus eum, qui venditionem contra pactum iniit, ad id quod interest praestandum. MENKE ****

* *Part. 2. Conclus 2. n. 18.*

** *In annot. ad Lauterbach. ad. rubr. tit. ff. d. leg. Commiss.*

*** *Part. 2. Const. 1. def. 18.*

**** *In Theor. et prax. pandect. tit. de emt. vend. §. 37. et 44.*

§. XXIV.

Haec itaque de causis contractum perfectum rescindentibus, dixisse sufficiat, superest, ut dispiciamus, quid resolutio contractu juris sit, intuitu fructuum ex re perceptorum, accessionum et usurarum. Si inter partes contrahentes de iis jam actum est, merito conventioni standum est, sin nihil determinatum repariatur, respiciendum utrum contractus resolvatur retro, a tempore contractus initi, quod exprimunt juris interpretes, resolvi contractum *ex tunc*, an vero demum a tempore actionis ad resolvendum contractum institutae, quod nominant resolvi contractum *ex nunc*. Sin prius existit, habetur ac si nunquam dominium a venditore discessisset, et contractus initus fuisset, hinc emtor pretium solutum cum usuris perceptis recuperat, et venditori non solum rem, sed etiam fructus omnes, quos ex re percepit, rei que accessiones restituit, damnum circa rem datum resarcit. Hoc locum invenit non solum in pacto additionis in diem, per expressam dispositionem *l. 6. ff. h. t.* sed et praec.

praecipue in lege commissoria l. 5. ff. de leg. commiss. cum nihil ex re penes emtorem residere oporteat, in qua fidem fefellit, nisi partem pretii exsolverit, quo casu fructus cum parte pretii soluta compensantur, l. 4. §. 1. ff. h. t. Vtlerius, quia per emtorem factum est, quo minus legi pareretur, nulla quoque ei competit actio ad recuperandam arrham l. 6. ff. h. t. partemque pretii vel Gabellam fisco solutam, in poenam fidei violatae, a Germanorum tenacitate in fide tuenda haud quaquam aliena MENK. * Sin vero contractus resolvitur ex *nunc*, omnes fructus intermedio tempore perceptos sibi retinet emtor, quippe in eum Dominium rite translatum fuit, pendentes vero inter emtorem et venditorem dividuntur, ne idem simul re et pretio fruatur. MENK. ** Hoc modo contractus resolvitur, si venditor ex jure retrovenditionis sibi reservato rem repetit; nullum enim dubium, intentionem contrahentium omnino fuisse, ut emtor fructus irrevocabiliter faciat suos, quemadmodum venditor interim pecuniae fructus in usus suos convertit, praesertim cum in potestate venditoris sit, elapso tempore retrovenditionis,olvere contractum an velit, nec ne, quod non contigit in additione in diem, et lege commissoria, uti monuit STRYK. *** simulque dubio obstanti satisfecit.

* In theor. et praxi Pandect. tit. d. leg. Commissor. §. 5.

** Cit. loc. ad tit. Emt. Vend. §. 34.

*** In Usu Modern, h. t. §. 6.



F I N I S.